

宋元學案

冊五

南湖學案表

杜煜

從孫

範

車若水

盛象翁

別見北山四先生學案

晦翁石克齋

潘希宗

延平白水籍

金叔明

附董華翁

元城山再傳

三武夷豫章

凍傳二程四

胡常

王賁 別見北山四先生學案

沈可亨

並玉峯講友

蔡希點

潘希宗

見上玉峯門人

戴良齊

吳澄

別為草廬學案

並玉峯同調

邱漸

戴亨

方儀

杜知仁

從孫 範 見上南湖家學

南湖第
門人 翁石克齋

車瑾

南湖同調

子 似慶

孫 倬

曾孫 若水 見上清獻門人

子 似度

孫 景山

曾孫 若綰 別見木鐘學案

孫 安行

別見木鐘學案

蔡夢說

黃超然

別見北山四先生學案

高耕

方儀

見上木居門人

宋元學案卷六十六

餘姚黃宗羲原本

後學慈谿馮雲濠校刊

男百家纂輯

鄞縣王梓材重校

鄞縣全祖望補定

道州何紹基重刊

南湖學案

祖望謹案南湖杜氏兄弟之在滄洲亦其良也再傳而有立齋
爲嘉定以後宰輔之最聲望幾侔于涑水矣其學傳之車氏是
時天台學者皆襲實牕荆溪之文統車氏能正之述南湖學案
梓材案是卷爲謝山所分立底蘖未全移入車玉峯脚氣集尙
有黎洲原本

朱石門人劉李再傳

主簿杜南湖先生煜

杜煜字良仲黃巖人嘉定元年進士官終東陽縣簿初與弟知仁學
于克齋石先生罄克齋致先生于紫陽于是師事者十餘年紫陽嘗
謂其論敬字工夫甚善論氣稟有偏而理之統體未嘗有異亦爲得
之學者稱南湖先生從孫則卿哀集成書名之曰南湖先生文集

台學源流

杜方山先生知仁

杜知仁字仁仲號方山南湖先生之弟也少有俊才爲舉子文操筆卽驚人刻意于詩不奇不已曰是不足以爲學于是卽六經語孟考論一時諸先生風旨至紫陽之書則拱而曰道在是矣窮理求仁吾知所止所著詩文十五卷訂禮讀易說詩多所論述未及哀次而卒同上

南湖同調

隱君車敬齋先生瑾

車瑾字元瑜號敬齋黃巖人究心理學隱居馬家山參台州府志

梓材謹案謝山學案劉記車瑾字敬齋蔡夢說之師也誤以其號爲字劉記又云車敬齋未識卽安行否又云敬齋當是魯齋弟子攷浙江通志引黃巖遺逸傳亦云車敬齋名瑾字元瑜景山其孫也觀先生弟子之門人有在魯齋之門者玉峯爲先生曾孫亦嘗學于魯齋則先生之不得爲魯齋弟子明矣

南湖家學劉李三傳

清獻杜立齋先生範

杜範字成之雲濠案一作成己黃巖人少從其從祖良仲仁仲游從

祖受學文公至先生益著由進士轉軍器監丞入對言君相之私未
去更新之效未睹又言近用名儒發明格致誠正之學願以其講明
見之施行及爲御史以言忤時相鄭清之先生自劾言宰相與臺諫
當同心爲國豈容以私害公并論斥侍從近臣監司郡守之失職者
時相愈忌之先生自入臺屢丐祠至改常少復五上歸田之請不允
還祕書監拜殿中侍御史先生奏臣冒耳目之寄輒忤宰相今又使
居言職豈以臣絕私比而其言猶有可取邪復言時相橫啓邊釁並
發其私疏入不報而有左史之命卽渡江歸嘉熙二年知寧國府四
年還朝累遷至禮部尙書兼中書舍人擢同簽書樞密院事先生自
還朝後抗言無隱情旣入都堂丞相史嵩之忌之遷同知樞密院事
以李鳴復參知政事先生曾劾鳴復不屑與共政去之會嵩之遭喪
拜先生右丞相力疾入覲帝親書開誠心布公道集衆思廣忠益賜
之先生上五事並條利病與政事可行者爲十二事一以去私爲主
雖秉鈞未久不能大有所匡正而其忠君愛國之忱悱惻懇到于宋
之末葉求之蓋亦難其選矣卒贈少傅諡清獻所著有古律詩歌詞
五卷雜文六卷奏稿十卷外制三卷進故事五卷經筵講義三卷

其舊矣

清獻文集補

老氏宗虛無尙柔謙傷周衰文敝欲返之樸古者蓋其著書本意若圖錄之傳符咒之術乃本之張道陵而寇謙之借李君以文其欺

梓材謹案謝山所錄清獻文集二條其一條移入車隘軒傳後

南湖門人

布衣邱木居先生漸

邱漸字子木黃巖人也受業南湖杜氏之門故與清獻爲莫逆交講明道學以淑後進清獻枋國先生多所贊畫然欲援之仕則不可卒以布衣終門人甚盛四書衍義其所著也門人之最著者曰戴亨補

雲濠謹案台州府志載先生鄉人尊之曰木居先生

方山家學

清獻杜立齋先生範

見上南湖家學

敬齋家學

隱君車隘軒先生似慶

車似慶字石卿號隘軒潛心理學隱居樂道年已及耄觀書猶至夜分釋經評史權古商今不襲簡策陳言迥出新意自成一家言所著

有五經論閒居錄隘軒文集杜清獻公陳實窗爲之序嘗與王侍郎方巖友善及方巖擢高第登顯仕強而附者鱗鱗然先生至絕迹其門郡守屢挽之不能致

參台州府志

梓材謹案台州志誤作車卿字似慶今據謝山節錄杜清獻文原注云隘軒名似慶字石卿改正

附錄

杜清獻曰車隘軒閒居錄于邪正義利雅俗之雜與傲上詔下凌弱畏勢等語皆不易之確論至謂以僻異解經當與侮聖言同科尤見其所守條律之嚴

補

車先生似度

車似度隱君瑾之子與其子景山皆老于儒

參柳待制集

車先生倬

車倬字章甫隘軒子能世其家以身爲鄉社倚重者四十年

參台州府志

府志

車密林先生景山

車景山號密林敬齋孫博學能文舉鄉科上春官不第遂老于家

同上

車韶溪先生安行

別見木鐘學案

聘君車玉峯先生若水

見下立齋門人

迪功車雙峯先生若綰

別見木鐘學案

敬齋門人

蔡起巖先生夢說

蔡夢說字起巖黃巖人嘗從車敬齋遊究心濂洛之傳開門授徒黃超然高志伊方儀皆其高弟所著書多散亡獨箋詩八卷藏于家

立齋門人劉李四傳

聘君車玉峯先生若水

車若水字清臣黃巖人賈似道再聘入史館不赴先生嘗登簣牕陳耆卿之門簣牕學古文于水心葉氏適而得其傳者也是時吳子良先從簣牕已登科聲譽甚震先生以晚進一日簣牕于人前揚之過當同門皆不平久之乃服已而事杜清獻公範乃自以爲求道之晚嘗著道統錄自周子至勉齋講明性理自號玉峯山民有宇宙略記世運錄道統錄玉峯冗稿

修

梓材謹案玉峯傳及脚氣集黃氏原本在金華學案今據序錄

入是卷

玉峯腳氣集

養氣要緊在有事與勿忘上工夫自到又不可責近效所謂大段著力不得也著力則氣壹動志前功不保矣勿正是爲常有事者言也勿助是爲勿忘者言也揠苗是爲已耘苗者言也不曾耘苗草長而苗且不存又何苗之可揠乎告子不肯做有事與勿忘工夫只願勿正勿助其曰不得于心勿求于氣不得于言勿求于心此後世釋氏之不動心非儒者之不動心

祖望謹案所謂揠苗非指告子

濂溪不言知格徑說定以仁義中正而主靜以上皆知格也厥彰厥微弗靈匪瑩其知格也至矣定之仁義中正則著實主靜則立本其知格也至矣

禮運首章載孔子言大道之行天下爲公大道旣隱始以禮義爲紀離禮義以言道是老子之言也

補

漢時士大夫奏事宮中要便入來只是不到後庭所以公孫宏燕見武帝或時不冠又不冠不見汲黯猶是周禮古意自武帝以宦者典章奏而士大夫遂疏門禁森嚴全隔絕矣于是親宦官宮妾之時多親士大夫之時少

補

禪家之法只是要人靜定癡守一向更不思別路久而自能通達此
吾儒至誠如神意吾儒公溥他只是自私他要不落窠臼誠是不落
窠臼然亦有可搏摸者問如何是佛祖西來意曰庭前柏樹子此語
最好是吾儒一箇仁字也如何是佛曰乾屎橛謂前人往矣我自當
作工夫說前人甚麼此句與吾儒別有問請師安心曰將心來與汝
安百文謂瀛山曰汝撥爐中有火否瀛山撥云無火百文起深撥得
火云此不是火吾儒亦如此教人但今聽之者不把作事看反不如
他能信向服行也然既曰悟道必當首先悟吾父母何如三綱五常
身體髮膚七顛八倒反借吾儒各分之說與四海五湖無所係著之
人捏合交道而自謂高于一世而人亦以是高之然若無朝廷見成
飯與喫見成法與持亦定坐禪不成也

程子令人類聚論語言仁處玩味此最切于教人仁實是難訓看來
看去自曉得可也上蔡識痛痒之語亦切蓋出于程子痿痺不仁之
語意愚嘗講程子觀雞雛可以觀人仁說得幾句自謂有功于諸儒
明道先生說今學者敬而不見得又不安者只是心生亦是太以敬
來做事得重此恭而無禮則勞也恭者私爲恭之謂也禮者非體之
禮是自然底道理也只恭而不爲自然底道理故不自在也人把禮

者非體之禮作句所以都說不得禮者非體之是一句禮是自然底道理是一句禮者不是將吾身體得出來乃是自然底道理纔說體之則便非自然便身與禮爲二

格物是窮理不可易也而以格爲至則有可籌繹者格于上下可以訓至格物難以訓至曰致知在至物非辭也愚嘗謂格且比方思量之謂此爲是此爲非此爲正此爲邪此爲輕此爲重今之諺欲知輕重則曰以稱格之此字必有傳承玉篇云格至也量也度也廣韻亦然彼之字義多出于古時經註格至也是堯典註不知度也量也出在何處以此訓格正與今文合向曾以告星渚星渚以面看屋久之無說

自先王之禮不行人心放恣被釋氏乘虛而入而冠喪葬祭皆被他將蠻夷法來奪了冠禮如他初削髮受戒之類其丁寧告戒甚嚴古時亦有幾箇好僧今時受戒出壇便破喪禮則有七次之說謂人死後每逢七日其魂必經陰司受許多苦凡七次愚夫惑其說請僧追薦然今讀書人旣闢佛老不用其說而于吾禮自不曾盡朝夕無奠朔望無奠飲酒食肉若罔聞知則又夷狄之不若也火化是大逆又被他說火化上天施斛一節旣薦祖先因請客共享之神不散非類

民不祀非族蓋是理之必然然後世小人但知自己飢餓何曾思親
往往雖有子孫亦是若敖則施斛畢竟是一祭祀以僧代巫或亦致
死致生之道呂居中云鄭慥堂先生亦不信佛老亦不廢施斛但要
擇僧補

魏文侯自請于周爲諸侯又爲田和請吾爲卜子夏段干木恥矣補
賴考叔取螯弧以登純孝者如此乎補

古者人鬼不相襲而相得也後世人求鬼鬼求人鬼亦非其鬼矣
程子曰盡其心者知其性也釋氏所謂識心見性是也若存心養性
一段則無矣愚謂釋氏但能存其無用之心養其無實之性却不盡
心知性也

乾元者始而亨者也利貞者性情也文王卦辭元亨利貞本只兩意
元而亨利于正而已今諸卦都是如此孔子文言自以所見拆作四
字說自是一項道理然非文王繫卦之本意也孔子到此却又就文
王本意作兩件說自乾元發出豁達呈露生意徧滿無不亨通所謂
始而亨也然皆可見者氣也須有理主于其中何嘗有不好底生意
蓋純粹至善是乾德之本然乾之性情只是利于正也乾之性情如
此則凡資始于乾者皆如此是故人可以爲善不可以爲惡蓋其本

來情性只是利于正也

梓材謹案玉峯脚氣集梨洲所錄者十一條今以其一條爲沈
可亭立傳于後又一條移入木鐘學案一條移入滄洲諸儒謝
山所錄十條今以其一條爲金叔明立傳于後又移入象山學
案一條木鐘學案一條蜀學略一條

附錄

王魯齋曰近得車玉峯書謂大學格致傳未嘗亡也欲以知止而后
有定一段合聽訟共爲一章不動斧鑿而元詞儼然誠追亡之上功
也昔日嚴陵吳守槃亦有此說見盧新之跋嘗以此說請教于西山
葉先生曰且去涵養

宗義案魯齋以知止爲格致之傳發自玉峯凡玉峯之所論著者
魯齋未嘗不歎服其學力也玉峯于魯齋在師友之閒魯齋之門
如吉甫玉峯皆所謂知過于師方堪傳授耳

玉峯講友

胡思齋先生常

胡常字立方號思齋黃巖人好修不慕榮利親掃戶庭一唾不委于
地几案光潔如洗書籍圖畫端正完整若手未觸觀書必端坐未嘗

行動挾攜雖在市廛跬步不出戶外彙編朱子語錄十卷又著戛釜吟三卷與車玉峯友善玉峯以兄事之王令華甫親訪其廬洪令穰趙守景緯皆加敬禮時就問政陰及物者甚衆天子錫恩台土使盡赴春官徐守宗臣曰若思齋不可挽之其相重如此一日疾革神色如常時猶奮語及大學疑義以書抵玉峯已而屬續玉峯志其墓

台州府志

堂長王石潭先生賁

別見北山四先生學案

沈先生可亨

沈可亨玉峯友人也玉峯脚氣集云趙幾道說誠無爲幾善惡作一圖上寫一誠字直落寫箇善字偏旁一絲寫箇惡字以惡是誠之庶孽善是宗嫡可亨疑之以問此疑甚善幾道自謂可勝胡氏同體異用之說不知其尤非也且如喜怒哀樂未發謂之中當其未發只是至善至于發時始有中節與不中節中節者是不走作這中不中節者是走作這中却不是這中先生箇中節旋生箇不中節如水之清有以濁之不是當初帶得這濁來若是庶孽亦從他身上出豈不枉屈

梓材謹案趙幾道說朱子文集屬之幾道從弟致道

玉峯同調

隱君蔡春山先生希點

蔡希點字子與號春山太平人博學善詩隱居授教從遊者以百數多擢高第躋臚仕先生安貧樂道以終其身所著有春山雜稿

參台

州府志

祕監戴泉溪先生良齊

戴良齊字彥肅黃巖人嘉熙進士累官祕書少監以古文鳴而尤精性理之學所著有中說辯妄通鑑前紀曾子遺書論語外書孔子年譜世譜七十子說林公輔答徐始豐書有曰當今經書雖皆具完而禮經獨爲殘缺如以漢儒之記有不純者郡先哲戴大監嘗力爲之辯草廬吳文正公師之得其說于今未大行也觀此其學之源委可見

參赤城新志

雲濠謹案謝山劄記有戴良齊泉溪集六字泉溪蓋先生之號

木居門人

戴蠡翁先生亨

戴亨字子元臨海人師事邱木居有太極圖說人心道心說近思錄補注朱子詩解北溪字義辨正其教人以毋自欺爲第一義嘗銘座

右曰莫見乎隱莫顯乎微欲人不知莫若弗爲

參浙江通志

梓材謹案台州府志載先生號蠹翁黃巖戴秘書良齊之從子也

方懋翁先生儀

方儀字儀父黃巖人少從邱木居學復參問于徐徑畝劉後村林竹溪諸公俱愛敬之性冲淡温厚待人以誠沈思于易至老無倦所著有懋翁玩易十卷及感遇歌候樵存稿

參台州府志

起巖門人敬齋再傳

康敏黃壽雲先生超然

別見北山四先生學案

高天逸先生耕

高耕字志伊其先觀察使棟從高宗南渡居臨海先生詩文意不拔俗語不驚人不已也晚歲益奇自號天逸所著有□金集

參台州府志

方懋翁先生儀見上木居門人

玉峯門人劉李五傳

州判盛聖泉先生象翁

別見北山四先生學案

隱君潘柏峯先生希宗